

### ***Li rin.ne èt l' boû.***

« – Vinez d'lé mi ! Poqwè brèyoz ?  
Dijoz m' quî ç' qui v's-a fait del pwin.ne !  
Alez doucemint ! Waitîz à vos !  
Qui v's-èstoz grosse, bininméye rin.ne !  
Vos-èstoz su vos dêrins djoûs ?  
Vos nos vôrîz bin fé lès figues ?  
Mi, dj' so sûr qui l' ci qu' mousserè foû  
N' pôrè mau d' yèsse traîtî d'ètique. »

Bin tranquile, au bwârd di l'étang,  
Dj'èsteûve à broster saquants yèbes ;  
Avore sur mi on gros puwant  
Tot fiant aler sès grossès lèpes.  
« – Ti n' fais nin l' pwèd, trosse tu rad'mint ! »,  
Di dj', è mi-minme, en vèyant l' bièsse.  
« – Mins choûte, gros, si t' vous ruv'nu d'mwin,  
T't-ossi boû qu' t'ès, ti m' waitèrès d' crèsse ! »

Avaler bokèt su bokèt  
Sins mawyî, ni d'dja r'prinde alin.ne  
Po-z-infler come on vraî tiquèt,  
Èt sinte li song boûre dins mès win.nes.  
« – Èt qwè ? Èst ç' qui dj' so grosse assez ? »  
On n' mi rèspond qu' pa dès djiperîyes !  
Bouter pus fwârt po l'zî mostrer :  
C'èst m' pia qui crève, tote aflachîye.  
Ci qui vout dîre :  
V'lu djouwer au gros sins l's-ècus,  
C'èst co l' mèyeû moyin d' fé rire !  
Si t' vous pèter pus wôt qui t' cu,  
T'aurès one brayète sins bot'nîre.  
À t' fé passer po grandiveûs,  
Tot-au d'dilong di t' vikérîye  
Ti pêyerès après ç' qu'èst pa-d'zeû  
L' seûl vraî bouneûr qu'on s'è raffîye.

Albert Delvaux  
Mârs 2011.

Fé lès figues : tourner en ridicule.  
Waitî d' crèsse : regarder avec défiance.  
Pêyî : désirer avidement.  
Si rafyî : se réjouir à l'avance.